

10 AUG 1997

Bosnia Herzegovina - Lawatan

PEMIMPIN TERTINGGI BOSNIAN-HERZEGOVINA TIBA UNTUK LAWATAN LIMA HARI

KUALA LUMPUR, 10 Ogos (Bernama) -- Pengerusi bersama Majlis Menteri Bosnia-Herzegovina, Dr Haris Siladjic dan Boro Botic tiba di sini hari ini untuk memulakan lawatan rasmi selama lima hari.

Lawatan itu adalah atas jemputan Perdana Menteri Datuk Seri Dr Mahathir Mohamad dan ia bertujuan untuk mengeratkan hubungan dua hala antara Malaysia dan Bosnia-Herzegovina.

Siladjic telah disambut oleh wakil khas Perdana Menteri, Tan Sri Ahmad Kamel Jaafar dan Duta Malaysia ke negara Balkan itu Rastam Mohamed Isa, di Lapangan Terbang Sultan Abdul Aziz Shah.

Siladjic yang juga bekas Perdana Menteri negara itu diiringi oleh Menteri Perdagangan Luar Bosnia-Herzegovina, Hasan Muratovic.

Botic yang tiba kemudian telah disambut oleh Timbalan Menteri Pendidikan Datuk Khalid Yunus.

Semasa lawatan itu, Siladjic dan Botic dijadualkan melawat Unit Perancang Ekonomi di Jabatan Perdana Menteri, Lembaga Kemajuan Perusahaan Malaysia dan Lapangan Terbang Antarabangsa Kuala Lumpur di Sepang, yang sekarang dalam pembinaan.

Siladjic dan Botic juga akan mengadakan perbincangan dua hala dengan Dr Mahathir dan menghadap Yang di-Pertuan Agong Tuanku Ja'afar.

Pengerusi bersama itu akan memberikan taklimat berkaitan keadaan semasa di Bosnia- Herzegovina, majlis itu dianjurkan oleh Institut Diplomasi dan Hubungan Luar.

Mereka juga akan mengadakan pertemuan dengan perwakilan daripada sektor swasta Malaysia.

Ini adalah kali pertama Siladjic dan Botic mengadakan lawatan rasmi secara bersama ke sebuah negara asing.--BERNAMA

HAK RI